

*Den cuadra di renovacion di Politica*

# AVP a funda instituto pa formacion politico

*Fundacion ta dedica na Digna Lacle-Herrera*



**ORANJESTAD** - Dilanti di Notario Ralph Yarzagaray partido AVP, representa pa su Presidente mr. Mike Eman y FESCA representa pa drs. Arjen Alberts y Rene Herde, a funda un instituto nobo: "Fundacion Instituto Formacion Politico Digna Lacle-Herrera".

E instituto aki tin como meta pa bay duna curso riba nivel estatal, politico-etico, fiscal, social-financiero-economico, labor, administrativo y organisatorio.

Miembronan di Directiva di e Fundacion aki ta: Luciano Milliard, Presidente, docente di estudionan constitucional na Universidad; drs. Paul Croes, Secretario, Politicologo y funcionario publico na Departamento Relacionnan Exterior, mr. Frederick Nuboer, Tesorero, Fiscalista; mr. Angele Martijn, Miembro, Abogado; Edwin Bibiano Abath, Miembro; funcionario publico na Departamento di Salud; mr. David Kock, Miembro, Abogado.

Mr. Mike Eman a splica cu e formacion di e instituto aki ta den cuadra di continuacion di e proceso di renobacion di politica cu AVP a inicia despues di eleccion 2001 bao di e pensamiento, scucha, pensa y trece cambio.

Erefleccion interno aki conduci pa dirigentenan nobo di partido bao liderazgo renovador di mr. Mike Eman a rindi progreso grandi den organisacion y contenido di AVP.

Un acercamento profesional sosteni pa un instituto scientifico FESCA a pone e AVP renoba den un posicion pa recupera no unicamente rapido pero cu un frotaleza interno cu ta basa su politico riba profundisacion y contacto cu "orea habri" pa pueblo.

Despues di eleccion 2005 e lider renovador di partido, mr. Mike Eman a anuncia cu e esfuersonan di renobacion di politica ta bai haya un dimension pafor di partido tambe.

Na formacion di Instituto Digna Lacle-Herrera e lider di AVP, mr. Mike Eman a bisa cu e base pa un team profesional ta un preparacion profundo y amplio. E tin confiansa cu e instituto aki cu e profesionalnan aki den e Directiva lo duna un aporte grandi na renoba y profesionalisa politica. E tabata tin hopi elogio pa e Presidente di e Fundacion, Luciano Milliard y miembronan drs. Paul Croes, mr. Frederick Nuboer, mr. Angele Martijn, Edwin Bibiano Abath, mr. David Kock.

Mr. Luciano Milliard a muestra cu un instituto asina ta hopi importante pa eleva e nivel di politica. E a muestra cu e directiva ta hopi entusiasmo cu e trabaonan nan dilanti y ta contento cu ta cuminsa di biah cu e promer curso.

Mike Eman ta splica cu e instituto ta bai haya e nomber di Digna Lacle-Herrera, pasobra e politica



aki semper a para pa un politica na nivel cu un contenido halto di etica y decencia caminda enfasis ta riba e capacidad y voluntad pa sirbi y no den habilidad pa destrosa un otro.

E promer cursonan di e Instituto ta cuminsa Diaranson 5 di april 2006 pa 7.30 di anochi na Cas di Partido. Ta trata di un curso di 8 siman riba Economia y Finanzas cu ta wordo presenta pa drs. Arjen Alberts. Esnan interesa ainda por inscribi na Cas di partido.

